

Thò Mòiq Da Paulô Gòi Ca Ti-mô-thê  
**1 Ti-mô-thê**  
**Bàu Patô Adroi**

*Hiniq wa Bàu Xèm Da Sech:*

Jò Paulô lam ta trong yàng pôn anoi hnài Bàu Lem, haq pariaq hnài Ti-mô-thê wèq ban Tagop Hadròih ta Ê-phê-sô jò haq lam ta gùng Ma-xê-đoan. Taiq haq ùh 'nì jò leq haq jah wìh hlài ca Ê-phê-sô, haq achìh thò cô gòi ca Ti-mô-thê.

*Mangai Achìh wa Hanam Achìh:*

Paulô achìh thò 1 Ti-mô-thê, 2 Ti-mô-thê, wa Tit. 1 Ti-mô-thê khoi achìh hanam 64 Atìq C.

*Bàu Anoi:*

Paulô achìh thò cô waq ca parông hnài Ti-mô-thê jah jùp ò Tagop Hadròih Ê-phê-sô. Ti-mô-thê phai tajraq hlài ca bàu 'nùt 'nah ngai enh anoi. Haq phai tajraq hlài bàu 'nah ngai hnài: “Yiang da mangai joq 'nàng lem ùh i ca tôiq wa ngè wa dahwèq joq 'nàng òiq ngan dù.”

*Rìm 'Nat:*

1. Bàu Pa'yèp Tajraq Hlài Mangai Hnài Amòng: 1:1–11
2. Bìac Am Dech am ca Paulô: 1:12–17
3. Hagleq Paulô Pariaq Hnài 'Màng Aih: 1:18–20
4. Bàu Parông Hnài ca Tagop Hadròih: 2:1–3:16
5. Trong Phai Broq ca Mangai Hnài Amòng: 4:1–16
6. Trong Phai Broq ca 'Bài Mangai 'Noiq: 5:1–6:2
7. Bìac Ma 'Noiq: 6:3–21

*Gòi Bàu Bòch Hmàih*

<sup>1</sup> Au Paulô sùq đô da Chuaq Jêxu Crich tiaq bàu thê da Boc Plình, Haq ma dèch bèn, wa Chuaq Jêxu Crich Haq ma can ngèh gòm da bèn,

<sup>2</sup> Gòi ca Ti-mô-thê, con joq 'nàng da au ta manoh lùì:

Waiq xìn Boc Plình Baq bèn wa Chuaq Jêxu Crich Chuaq bèn am ca con jah biac am dech, biac xa-öch wa biac catèm.

<sup>3</sup> Manàiq au bahmàng hlài bàu au ma khoi anoi ca con jò au lam cwa gùng Ma-xê-đoan, con phai ỏi hlài ta Ê-phê-sô ðòiq doi ca wì apaq hnài đaoq ma ùh troq, <sup>4</sup> hadai apaq hèm trùh ca bàu 'mon ùh i joq 'nàng wa biac xinoi ùh 'nì lùch, taiq biac aih broq loh hiniq tarahen thai ca pa'nhrang mangai ðòiq i manoh lùì. <sup>5</sup> Trong da con ma ep hnài, aih can loq waq loh enh manoh lem hreo, manoh loq ma lem wa manoh lùì joq 'nàng. <sup>6</sup> I 'nah ngai tawìh cađac trong aih, lam lac tiaq bàu capoch ùh i ca lòiq, <sup>7</sup> enh broq thài hnài Ranenh, mahaq wì ùh 'nì loq dèh ca bàu hnài aih 'nhac ca cla wì doi bàu aih joq 'nàng.

<sup>8</sup> Bèn loq Ranenh joq lem tàng bèn broq troq tiaq ranenh. <sup>9</sup> Bèn loq ro rang Ranenh jah broq loh ùh xài broq am ca mangai ta-atoq, mahaq am ca 'bài mangai broq ùh troq ca ranenh, tajraq hlài, ùh enh tiaq Chuaq, mangai broq tôiq, capoch 'mèq ðùng ca Boc Plình, jêh đac dèh miq baq, jêh mangai, <sup>10</sup> 'bài mangai tango anang wa manhài tràì, 'bài mangai calô waq ca mangai calô, padro mangai, capoch amòng, pachac 'nùt wa ðìq ca biac tajraq hlài ca bàu joq 'nàng, <sup>11</sup> aih tiaq troq ca Bàu Lem 'ngah 'ngai da Boc Plình đàng ca jah manè, wa aih Bàu Lem Boc Plình khoi jao ca au.

### *Chuaq Loq Xa-öch*

<sup>12</sup> Au manè apôi Chuaq Jêxu Crich, Chuaq da bèn ma khoi am tam padren ca au taiq Haq hnoq au mangai wèq

dèh bàu, ma jah Haq yõc au broq mangai patìh biac Haq, <sup>13</sup> 'nhac adroi cô nèh au raq mangai capoch 'mèq ùng ca Chuaq, loq ti rùp wì, manoh rataoq ca Chuaq, mahaq Chuaq khoi xa-õch ca au, ma jah 'màng aih au khoi broq biac aih jò au òi awàt, 'nhòq lùì Chuaq. <sup>14</sup> Biac am dech da Chuaq khoi bình halùih ta au, pajùm can lùì wa can loq waq ma i òi ta Chuaq Jêxu Crich.

<sup>15</sup> Cô bàu ðang ca lùì ðìq ca manoh: Chuaq Jêxu Crich trùh crõng taneh ðòiq ðõng dèch 'bài mangai i tòi, mahaq òi ta 'bài mangai i tòi au tòi yi bác. <sup>16</sup> Taiq 'màng aih Crich Jêxu khoi xa-õch ca au ðòiq patô 'noh manoh chiuq àt da Haq ca au ðòiq broq dua ca mangai 'noi q lùì Haq, èh wì jah i can rìh hloi hloi. <sup>17</sup> Waiq Boc Plình, Bùa ma rìh hloi hloi, toq Haq khôn rabiaq, ùh cachit, ùh jah hnoq Haq, joq ðang ca padèch ha'nhèq wa jah 'ngah 'ngai hloi hloi. Amen.

<sup>18</sup> Ôi Ti-mô-thê con au, bàu pariaq hnài au ma khoi thê ìh tiaq bàu capoch adroi ma khoi patô ca ìh, ìh phai hmàng hlài bàu aih ðòiq tajêh poh xam manoh tanuq, <sup>19</sup> wèq cajap manoh lùì wa manoh loq ma lem. I 'nah ngai khoi cađac manoh loq ma lem aih, èh manoh lùì wì haq hadai hnhung. <sup>20</sup> Ta wì aih i Hi-mê-nê wa A-lec-xan-đò, au khoi am wì haq ca can kiac Satan, waq ca wì haq hõc loq apaq capoch 'mèq ùng ca Boc Plình hòm.

## 2

### *Waiq Khàn Am ca Rìm Ngai*

<sup>1</sup> 'Màng aih au pariaq hnài ìh, adroi ðõng phai waiq khàn, waiq xìn wa manè apôi Boc Plình am ca rìm ngai, <sup>2</sup> am ca 'bài bùa, am ca ðìq ðõng mangai ma wèq cwiang, ðòiq bèn jah rìh hatenh, catèm, ðìq ca manoh loq iu Chuaq wa caq òi tiaq trong hadròih. <sup>3</sup> Aih biac troq wa lem manoh Boc Plình, Chuaq ma ðõih dèch bèn. <sup>4</sup> Haq enh rìm

ngai jah dèch claih wa 'nì loq ca bàu joq 'nàng. <sup>5</sup> Ma jah 'màng aih i mòiq toq Boc Plình raq wa i mòiq Ngai òi ta'ne Boc Plình wa con mangai, Mangai aih Chuaq Jêxu Crich. <sup>6</sup> Haq khoi am dèch chac hamac broq nègè tadreo ðòiq jah dèch rớt rìm ngai troq jò ma pajaq ðòiq patô Haq enh ðòih dèch con mangai, <sup>7</sup> taiq 'màng aih, Chuaq khoi thê au broq mangai anoi hnài Bàu Lem, broq mangai sùq ðô wa thài hnài, hnài biac manoh lùì wa bàu joq 'nàng am ca mangai jàn 'noi. Cô au doi bàu joq 'nàng, ùh amòng.

<sup>8</sup> 'Màng aih, au enh mangai gu calô rìm nòi dèch ti hadròih waiq khàn, ùh nòih wa ùh rahen. <sup>9</sup> Au hadai enh mangai cadrì caxùnh atàc bu troq ðòiq haq 'nàng lem ca mat hnoq, anì caq bu tajì ca dađeh gu cadrì tiaq Chuaq, ùh catèh trong denh xàc, ùh axràng wang, ngóc loq eo cwàn canaq 'bac, <sup>10</sup> mahaq phai i manoh broq biac lem, 'màng aih tajì ca mangai cadrì lùì Chuaq.

<sup>11</sup> Gu cadrì ep hatenh tamàng hnài wa phai loq iu ðiq ca manoh. <sup>12</sup> Au ùh am cwàng gu cadrì hnài, hadai ùh jah wèq cwàng enh 'nhèq ca gu calô, mahaq phai òi hatenh. <sup>13</sup> Ma jah 'màng aih Ađam jah broq loh adroi ðống ðiq, hi khoi Êwa, <sup>14</sup> hadai ùh xài Ađam ma 'bìq padô 'nùt, mahaq gu cadrì ma 'bìq padô 'nùt 'mùt ta tôiq lôi, <sup>15</sup> èh chiùq jìq xa jò xa-ông con, mahaq gu cadrì jah dèch claih tàng haq cajap manoh lùì, yóc manoh loq waq, i manoh hadròih, wa loq wèq ca dađeh.

### 3

#### *Mùc Sù Ma Wèq 'Bàì Tagop Hadròih*

<sup>1</sup> Cô bàu jah canòm joq 'nàng: Tàng i mangai leq nègè enh broq mùc sù ma wèq 'bàì Tagop Hadròih, biac haq enh broq, aih biac lem. <sup>2</sup> 'Màng aih, mùc sù ma wèq 'bàì Tagop Hadròih phai ùh i ca nòi jah trech, yóc mòiq toq mai, nui pagàt dađeh, khôn rabiaq, caq òi lem, loq ðìh yóc tamoi

thia ta hnem, rabiaq ca hnài, <sup>3</sup> Ûh jah gìa ca alac, hadai apaq loq nòih, mahaq phai i manoh habùat, loq hatroq ca oh daq, ùh jah tarahen, ùh jah ham ca 'bac jèn, <sup>4</sup> phai rabiaq ca wèq cwàng dèh cadraq cla, hnài dèh con caiq loq dì bàu wa loq iu dèh miq baq dìq manoh. <sup>5</sup> Ma jah 'màng aih tàng i mangai leq ùh 'nì wèq cwàng dèh hnem cla, èh broq 'màng leq ma loq wèq cwàng Tagop Hadròih da Boc Plình. <sup>6</sup> Mangai neo tiaq Chuaq ùh jah broq mùc sù ma wèq 'bài Tagop Hadròih yùq haq loq padèch dađeh, èh 'bìq ta'mòq troi can kiac Satan. <sup>7</sup> Mùc sù ma wèq 'bài Tagop Hadròih phai jah wì 'nhòq tiaq Chuaq anoi hlài haq lem, òoiq ùh hìa q i mangai leq trech haq wa ùh hlech hlòp can kiac Satan.

<sup>8</sup> 'Bài chàp sùq hadai phai đàng ca jah padèch, ùh capoch baiq bàu, ùh gìa ca alac, ùh ham ca 'bac, <sup>9</sup> mahaq phai yóc manoh loq ma lem hreo, wèq bìac halac halùai da manoh lùì. <sup>10</sup> 'Bài mangai aih adroi đống dìq, hadai phai chiuq baxa thù, tàng ùh i ca nòi leq jah trech, èh men jah broq mangai chàp sùq.

<sup>11</sup> Mai da 'bài mangai patìh bìac Tagop Hadròih hadai phai đàng ca jah padèch, apaq capoch 'mèq, mahaq nui pagat dađeh wa loq wèq dèh bàu.

<sup>12</sup> Mangai chàp sùq phai broq ỡng mòi q toq mai, rabiaq wèq cwàng dèh con wa cadraq cla. <sup>13</sup> Ma jah 'màng aih 'bài chàp sùq ma khoi patìh lem, jah padèch ha'nhèq, taiq i manoh lùì dèh nhò loq canòm ca Chuaq Jêxu Crich.

<sup>14</sup> Au enh renh jah trùh hmài h ca ìh, mahaq au achìh thò cô adroi. <sup>15</sup> Mahaq tàng au loq xòi trùh, au achìh òoiq ìh loq caq ỏi 'màng leq ỏi ta hnem Boc Plình, aih Tagop Hadròih da Boc Plình ma rìh hloi hloi, jrang wa tanam da bàu joq 'nàng. <sup>16</sup> Joq 'nàng ùh i ca mangai leq jah chòiq bìac halac halùai càn caiq da can rìh hadròih:

Aih Boc Plình khoi jah mahno loh xam chac hamac con mangai;  
 Jah Yiang Hadròih doi khoi ta-atoq;  
 Jah 'bình plình ngan hnoq,  
 Khoi anoi hnài ca rìm jàn;  
 Dìq ca crõng taneh jah lùì canòm;  
 Èh jah dèch tõi ta Diac Plình 'ngah 'ngai.

## 4

*'Nhòng Mangai Cađac Trong Chuaq*

<sup>1</sup> Yiang Hadròih doi ro rang, 'nhòng atìq lùch cô èh, bàc ngai cađac trong Chuaq, tiaq 'bài yiang amòng, wa tiaq trong hnài da can kiac, <sup>2</sup> tiaq mangai bầu lem manoh dù wa mangai loq capoch amòng, ma i manoh loq, khoi cùn. <sup>3</sup> Wì haq ùh am ta'nèp õng mai, ùh thê caq 'bài dahwèq caq Boc Plình khoi broq loh am ca mangai i manoh lùì wa loq ro ca bầu joq 'nàng manè apôi Chuaq adroi ca caq, <sup>4</sup> Rìm hiniq Boc Plình ma khoi broq loh ñìq lem, ùh i ca hiniq leq ma ùh khòh caq tàng bèn yõi caq xam manoh manè apôi Chuaq, <sup>5</sup> ma jah 'màng aih nhò bầu Boc Plình wa bầu waiq khàn ma jah dahwèq aih jah wìa hadròih.

*Bìac Broq Da Ti-mô-thê*

<sup>6</sup> Tàng ìh hnài bìac aih ca oh daq, èh ìh jah wìa mòiq ngai hapõng jang lem da Chuaq Jêxu Crich, wa jah ban xam bầu Boc Plình wa bầu joq 'nàng ma ìh khoi tiaq enh nèh. <sup>7</sup> Ep wia hangai ca bầu 'mon liq làn, mahaq ep axràm manoh lùì waq ca jah hadròih joq 'nàng. <sup>8</sup> Ma jah 'màng aih bìac axràm padren trong chac hamac i lòi q toq 'biaq, mahaq tiaq trong hadròih i lòi q ca rìm bìac, hadai i bầu hùaq am ca 'nhòng cô wa 'nhòng ma atìq hò m. <sup>9</sup> Aih bầu capoch cajap cajinh, ñang ca lùì ñìq ca manoh, <sup>10</sup> taiq bìac aih dài bèn chiùq xalep wa tajêh poh, taiq bèn khoi ngèh

gòm canòm Boc Plình ma rìh yôt, Haq Chuaq ma dèch da rìm ngai, wa yi hnao hòmm, mangai ma lùì Chuaq.

<sup>11</sup> Phai pariaq hnài dìq ca bàu aih. <sup>12</sup> Apa q òi q wì khìn ìh taiq ìh 'yoh hanam, mahaq ìh phai broq dua ca oh daq, ta bàu capoch, xam biac broq, xam can loq waq, xam manoh lùì wa caq òi lem hreo. <sup>13</sup> Jò gòm au trùh, ìh phai panim đốc Sech Hadròih, doi parông wa hnài dìq ca oh daq. <sup>14</sup> Apa q cađac hêt biac hnhu am Chuaq khoi am ca ìh cwa bàu capoch thai Boc Plình, jò wì cra q da Tagop Hadròih òi q tì wì wai q khàn ca ìh.

<sup>15</sup> Phai dìq ca manoh wèq biac aih waq ca rìm ngai jah hnoq biac ìh yòng càn òi ta Chuaq. <sup>16</sup> ìh phai loq wèq dađeh wa biac hnài da ìh, cajap manoh ta rìm biac aih, tàng broq 'màng aih ìh wa 'bài mangai ma tàng ìh jah dèch claih.

## 5

### *Bàu Nhet Hnài Con Caiq Chuaq*

<sup>1</sup> Apa q dèh bàu ca mangai cra q calô, mahaq phai pariaq hnài wì haq tìah dèh ca baq wa ngan 'bài mangai calô 'yoh hanam tìah dèh ca oh daq, <sup>2</sup> hadai pariaq hnài mangai cra q cadrì tìah dèh ca miq, 'bài gu adrùh hadai tìah ca oh daq, mahaq phai yốc dèh manoh lem hreo ta'ne wì haq.

<sup>3</sup> Phai loq iu wa wèq ban 'bài mangai cadrì hadrô joq 'nàng hadrô. <sup>4</sup> Mahaq tàng 'bài mangai hadrô aih i con, i xau, adroi đống dìq 'bài con xau phai loq mahno dèh manoh cliac loq waq dèh ca miq baq, boc yaq, òi q dèn hlài cùng miq baq, boc yaq, ma jah 'màng aih biac aih lem ca manoh Boc Plình. <sup>5</sup> Mangai hadrô joq 'nàng rìh òi mòi q ngai, khoi òi q dèh manoh gòm canòm nòi Boc Plình dahì, damang, cajap manoh wai q khàn, wai q xìn. <sup>6</sup> Mahaq phàn da mangai hadrô ma òi ham enh ca biac bùì pagôq, 'nhac ca rìh jì tìah ca cachìt. <sup>7</sup> Phai bahmàng hlài biac aih ca

Tagop Hadròih waq ca wì haq ùh i ca nòi leq jah trech.  
<sup>8</sup> Mahaq tàng i mangai leq ùh 'nì jùp òò dèh oh daq, yi hnao hòmm aih ùh jùp òò dèh mangai ta hnem, aih mangai khoi chòiq cađac manoh lùì, 'mèq yi hnao ca mangai 'nhòq tiaq Chuaq.

<sup>9</sup> Men jah achìh 'mùt hiniq ta sôq 'bài mangai cadrì hadrô, phai jah 60 hanam, enh nèh i mòiq toq ống raq,  
<sup>10</sup> wa jah i tiang 'bang nhò broq biac lem, rabiaq ca hnài ban con caiq, loq đìh yốc tamoi ùh canao, 'nheo jènh 'bài mangai hadròih, loq jùp òò 'bài mangai pa, èh broq rìmm biac lem ca mangai.

<sup>11</sup> Mahaq phai chòiq ca achìh hiniq 'bài mangai hadrô ỏi 'yoh hanam. Ma jah 'màng aih jò biac ham enh trong chac hamac yi hnao ca loq enh broq biac Crich, èh wì haq yốc ống.  
<sup>12</sup> 'Màng aih, wì haq khoi chiuq ta 'mòq tôiq, taiq wì haq khoi blòq dèh bàu pachac baxèm.  
<sup>13</sup> Yi hnao hòmm, wì haq i manoh ca ỏi dech ùh do broq, ha-ìa enh hnem cô trùh hnem tau, ùh xài toq aih hi hêq, wì haq đìq jaq bàc bàu, loq capoch troq mangai 'noi, adràc dabau anoi biac ùh khòh ca anoi.  
<sup>14</sup> 'Màng aih au enh 'bài mangai cadrì hadrô ỏi 'yoh hanam, lem ca yốc ống, xa-ông con, wèq ngan dèh ta hnem, ùh hìaq broq nen ca 'bài mangai enh git ca bèn i jò ta 'nài capoch 'mèq bèn.  
<sup>15</sup> Ma jah 'màng aih khoi i 'nah ngai gù cadrì hadrô blòq tiaq can kiac Satan.

<sup>16</sup> Tàng mangai tiaq Chuaq leq i mangai hadrô ỏi dèh ta hnem, èh phai jùp òò wì haq đòiq ùh hìaq tam genh trap cô ca Tagop Hadròih, waq ca Tagop Hadròih jah jùp òò 'bài mangai hadrô joq 'nàng.

### *Phai Loq Iu Mangai Craq*

<sup>17</sup> 'Bài craq broq gàu leq rabiaq ca wèq cwàng, èh bèn phai loq iu wì haq bàc phàn, yi hnao hòmm wì ma loq panim anoi hnài bàu Chuaq.  
<sup>18</sup> Ma jah 'màng aih Sech Hadròih



i doi: “Îh apaq xrôq hacùng 'bo jò haq len 'mau;”<sup>☆</sup> wa “Mangai broq cùng đàng ca jah dèh 'bac cùng dadeh.”<sup>☆</sup>  
<sup>19</sup> Apaq lùì tàng bu mòi q ngai i bàu kian craq broq gàu tàng ùh i ca baiq loq piq ngai anoi hlài biac aih. <sup>20</sup> Mangai leq 'nang broq tôiq lôì, èh lech ca wì haq enh ngìa ca bàc ngai òi q broq ca mangai 'noi q yùq crè. <sup>21</sup> Enh ngìa Boc Plình, enh ngìa Chuaq Jêxu Crich, wa enh ngìa ca 'bài 'bình plình ma khoi jah ràih, au òi q dèh ca manoh thê ìh phai òi tiaq bàu tanap aih, apaq yỏc manoh tagìq tagìa wa apaq yỏc manoh gen can.

<sup>22</sup> Apaq renh òi q tì enh 'nhèq ca mangai leq òi q jao ca haq biac broq ta Tagop Hadròih, broq 'màng aih khoi wiang 'mùt dadeh mùt ta tôiq lôì mangai 'noi q; phai wèq dadeh òi q jah lem hreo.

<sup>23</sup> Apaq ôq toq diac hangeo, mahaq phai ôq toq xít alac nho, ma jah 'màng aih taiq padùc ìh bàc yàng loq ùh hróc.

<sup>24</sup> Tôiq lôì da 'nah ngai èh ro rang, jah hnoq adroi ca wì haq chiùq hadrah, khoi èh tôiq lôì da 'nah ngai èh ta atìq men loq ro. <sup>25</sup> Biac lem hadai 'màng aih, i biac èh mahno loh 'mòi, i biac èh ùh jah mahno loh 'mòi, mahaq atìq èh ùh i biac cleq jah cadoc hlèp.

## 6

### *Mangai Hapǒng*

<sup>1</sup> Òi q òi q mangai ma broq hapǒng òi q phai loq iu dèh craq, waq ca hiniq Boc Plình wa Bàu da Haq ùh hìaq broq ca mangai ma loq enh capoch 'mèq òi q ca Boc Plình.

<sup>2</sup> Cabô i craq lùì Chuaq, taiq biac aih apaq chaq nen ùh iu wì haq, mahaq phai broq biac yi hnao hòm, ma jah 'màng aih mangai bèn ma pì patìh, aih mangai tiaq Chuaq wa khòh loq waq wì.

<sup>☆</sup> 5:18 5:18 RAH 25:4. <sup>☆</sup> 5:18 5:18 LUC 10:7.

Cô biac con phai pariaq hnài oh daq. <sup>3</sup>Tàng i mangai leq hnài đaoq ma 'noiq ùh hatroq ca đaoq da Chuaq Jêxu Crich wa Bàu da Haq ma tiaq trong hadròih, <sup>4</sup>èh mangai aih khi padèch dađeh, ùh 'nì đeh cacleq, mahaq i manoh ham ca tarahen wa goh wech trong bàu capoch mangai 'noiq, enh aih xa-ông loh bəc biac tagit 'bõn, tarahen, i manoh dù loq hèm 'mèq ca dabau, <sup>5</sup>loq tarahen ca mangai 'noiq, taiq wì haq i manoh 'mèq, ùh canao loq ca biac joq 'nàng, wì toq hèm biac tiaq Chuaq aih jah broq lòiq ca dađeh.

<sup>6</sup>Mahaq, biac loq iu Chuaq joq 'nàng wa loq bùi catèm ta manoh, aih raq can lòiq càn. <sup>7</sup>Ma jah 'màng aih, jò clih enh cliac bèn ùh i wê cacleq, jò cachit bèn hadai ùh jah 'ràng tiaq cacleq. <sup>8</sup>'Màng aih, tàng bu i caq, i caxùnh, èh phai loq tàu ta manoh. <sup>9</sup>Mahaq mangai ma ham ca can padrõng èh hlac ta biac padô 'nùt, hlech manet tacro, ta bəc biac ham enh ùh troq, aih biac broq ca con mangai 'bìq hù hnhung hloi hloi. <sup>10</sup>Ma jah 'màng aih biac loq ham ca 'bac jèn tagùq rangàu broq ca rìm biac loh ca ngan dù. I 'nah ngai taiq hnan tiaq 'bac jèn, ma jah cađac manoh lùì, pòq yõc ca dađeh bəc biac xalep wa mango.

<sup>11</sup>Mahaq ìh mangai da Boc Plình, ep wia ma hangai ca biac aih beq, lam tiaq trong ta-atoq, biac hadròih, manoh lùì, manoh loq waq, manoh chiuq àt wa manoh habuat. <sup>12</sup>Yõc manoh lùì òòiq tajêh poh xam manoh tanuq, nhàn yõc can rìh hloi hloi ma Boc Plình khi creo ca ìh, jò ìh hua pa'noh dèh manoh lùì enh ngìa ca bəc ngai hnoq, <sup>13</sup>enh ngìa Boc Plình ma hnhu am can rìh ca rìm ngè biac òi ta crõng taneh wa enh ngìa ca Chuaq Jêxu Crich ma khi capoch bàu troq enh ngìa ca 'Bõnti Philat, <sup>14</sup>au thê con phai tiaq bàu thê òòiq ùh i ca nòi leq jah trech trùh hì da Chuaq Jêxu Crich bèn trùh hlài crõng taneh cô, <sup>15</sup>Haq jah trùh crõng taneh cô troq jò Boc Plình pajaq. Boc Plình ma wèq plình crõng taneh, đàng ca jah manè apôi, Bùa enh

'nhèq ca rìm bùa, Chuaq enh 'nhèq ca 'bài chuaq. <sup>16</sup> Toq Haq raq ma ùh 'nì cachit, Haq òi ta'ne can 'ngah ùh i ca mangai leq jah trùh haten, ùh i ca mangai leq lah hnoq Haq, hadai ùh i mangai leq jah hnoq Haq, Haq jah padèch yôt yôt, i cwìang itai òi ti Haq trùh hloi hloi. Amen.

*Mangai Padrǒng Can*

<sup>17</sup> Ep thê mangai padrǒng can òi crǒng taneh cô, apaq catèh, hadai apaq òiđiq dèh manoh gòm canòm nòi cùng hang hì cô, i hì da èh òiđiq, mahaq phai òiđiq dèh manoh gòm canòm nòi Boc Plình, Haq hi hnhu am ca bèn rìm bìac bình halùih waq ca jah bùi manoh. <sup>18</sup> Wì haq phai broq lem òiđiq jah padrǒng can xam bìac broq lem, hadai i manoh rùng rai, loq axong cùng hang dađeh ma i ca mangai 'noiđiq. <sup>19</sup> 'Màng aih wì haq jah don òiđiq ca dađeh ngè canaq, broq xèm cajap cajình am ca dađeh, òiđiq jah yǒc bìac can rìh joq 'nàng.

*Bàu Tanap Atìq Lùch*

<sup>20</sup> Ôi Ti-mô-thê, ep wèq cajap bìac khai jao am ca ìh, wia hangai ca bàu ùh troq da crǒng taneh, bàu capoch liq làn, wa bìac tarahen padèch dađeh doi 'nì loq, <sup>21</sup> taiđiq i 'nah ngai doi 'màng aih, wì khai lam lac trong wa cađac dèh manoh lùì.

Waiđiq xìn bìac am dech da Boc Plình òi ti oh dađ! Amen.

Sech Hadròih  
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo  
All rights reserved.

2020-11-17

---

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d